

## 12 хутбе

Сайгылы мусульманлар! Бугуньки хутбемиз къабир зиярети акъкъында оладжакъ. Пейгъамбер Эфендимиз бир Хадис-и шерифте буюргъан эди: «Мен сизлерге къабир зияретини ясакълагъан эдим, амма шимди къабирлерни зиярет этинъиз». Сайгылы джемаат, Пейгъамбер Эфендимиз бир вакъытлары къабир зияретини ясакълагъан эди, амма бир вакъыттан сонъ деген эди: «Къабирлерни зиярет этинъиз, чюнки бу сизлерге ахиретни хатырлатыр».

Къабирлерни зиярет этмек – бу хайыр амеллерден биридир. Пейгъамберлернинъ ве эвлияларнынъ къабири олса, бу зияретнинъ даа да чокъ савабы бар. Берекетленмек ичюн бир Пейгъамбернинъ я да эвлиянынъ къабирине барып, о къабир ичинде олгъан Пейгъамбер я да эвлиянынъ хакъкъы я да урьмети ичюн Аллаһтан истемек – бу Аллаһкъа якъынлаштыргъан амеллерден биридир.

Амма ваһабистлер къабир зияретини инкяр этелер, чюнки олар дейлер: «Бир мусульман эвлиянынъ къабирине барып, о къабирде яткъан эвлиянынъ хакъкъы ичюн Аллаһкъа дуа этсе, бу – Аллаһкъа ширк къошмакътыр», – деп, айталар. Не ичюн бойле айталар? Оларгъа коре, къабир зиярети – бу мушриклернинъ япкъаны киби Аллаһнен инсан арасына васыта (яни ортакъ, посредник) къойылмакъ ола экен. Сайгылы мусульманлар!

Оларнынъ айткъаны Къур’ангъа ве Хадиске къаршы келир. Пейгъамбер Эфендимиз шойле буюргъан эди:

\*

Манасы: «Ким къабримни зиярет этсе, о шефаатиме наиль олур».

Яни Къыямет куньде Пейгъамберимиз онъа шефаат япаджакъ.

Сайгылы мусульманлар! Биз билемиз ки, Пейгъамбер Эфендимиз Къыямет кунюнде мусульманларгъа шефаат этеджектир, яни тевбе этмеден буюк гунаһ ишлегенлерге Аллаһтан олар ичюн афу истеджектир. Аллаһ Пейгъамберимизнинъ шерефини инсанларгъа къоштермек ичюн, о гунаһкяр инсанларны афу этеджек.

Аллаһу Те’аля шойле буюрды:

\*

яни «Сизни Аллаһкъа якъынлаштыргъан хайыр амеллеринъизнен весиле этинъиз», яни ярдым истенъиз.

Аллаһ бизим япкъан намазларымыздан, туткъан оразаларымыздан ве башкъа ибадетлеримизден файдаланмаз, амма бу япкъан ибадетлернен бизге дженнетни къазанмагъа эмир этти. Аллаһ истесе эди, бизлерни хайыр ишлер япмадан дженнетке кирсетир эди.

Намаз, ораза киби хайыр ишлер бизге дженнетке кирмеге бир себептир, амма олар бизлерни дженнетке кирсетмейлер, бизни Аллаһ дженнетке кирсете.

Эвлияларнынъ къабирини зиярет эткен мусульманлар инаналар ки, къабирде яткъан инсан айда, зарар яратмаз; Аллаһ бу къабирде яткъан инсаннынъ урьмети ичюн файданы яратыр.